



閩詞鈔卷四目錄

馬子嚴 十四首

嚴仁 三十首

嚴參 二首

嚴羽 一首

陳以莊 三首

李芸子 一首

黃公紹 二首

馮取治 十七首

馮艾子 六首

李振祖 一首

陳德武 三十二首

黃鑄 二首

黃簡 三首

鄭楷 一首

李呂 三首

劉學箕 三十五首

留元剛 一首

留元崇 一首



廖瑩中 一首

翁孟寅 四首

吳激 七首

洪希文 一首

福建士子 一首

葛長庚 八十二首

蘇氏 六首

阮氏 一首

孫氏 八首

凡二十七家共詞二百六十六首

閩詞鈔卷四

閩中葉申薌編輯

馬子嚴

建安人字莊甫自號古洲居士仕至岳陽守

水龍吟

為陳坂種玉莊作

買莊為貯梅花玉妃一萬森庭戶古來詞客比方不類

可憐毫楮誰掃塵凡獨超物表神仙中取是崑邱標致

姑山風骨除此外吾誰與 九醞醞雪乳和金盤月

邊清露壽陽嬌駭單于疎賤不堪充數弄玉排簫許瓊

揮拍胎禽飛舞待先生披著羊裘鶴氅作園林主

又海棠

東君直是多情好花一夜都開盡杏梢零落藥闌遲暮
不教寧靜風度秋千日移簾幙翠紅交映正太真浴罷
西施濃抹都沈醉嬌相稱 磨遍綠窗銅鏡挽春衫不
堪比並暮雲空谷佳人何處碧苔侵逕睡裏相看酒邊
凝想許多風韻問因何卻欠一些香味惹旁人恨

臨江仙 上元

人意舒閑春事到徐徐弄日微雲翠鬢飛遶鬧蛾羣烟
橫沾酒市風轉落梅邨 歲事一新人半舊相逢際晚
醺醺花間亭館柳間門剋除風雨外排日醉紅裘

月華清 憶別

瑟瑟秋聲蕭蕭天籟滿庭搖落空翠數遍丹楓不見葉
間題字人何處千里嬋娟愁不斷一江流水遙睇見征
鴻幾點碧天無際 悵望月中仙桂問竊藥佳人誰與
同歲把鏡當空照盡別離情意心裏恨莫結丁香琴上
曲休彈秋思怕裏又悲來老卻蘭臺公子

賀聖朝

游人拾翠不知遠被子規呼轉紅樓倒影背斜陽墜幾
聲絃管 荼蘼香透海棠紅淺恰平分春半花前一笑
不須慳待花飛休怨

魚游春水

池塘生春草數盡歸鴻人未到天涯目斷青鳥尚賒音
耗曉月頻窺白玉堂暮雨還溼青門道巢燕引雛乳鶯
空老庭際香紅倦掃乾鵲休來枝上噪前回準擬同
他翻成病了欲題紅葉憑誰寄獨抱孤桐無心挑眉間
翠攢髻邊霜早

海棠春

柳腰暗怯花風弱紅映秋千院落歸逐燕兒飛斜撼真
珠箔滿林翠葉燕支萼不忍頻頻覷著護取一庭春
莫彈花間鵲

鷓鴣天

睡鴨徘徊烟縷長日高春困不成妝步欹草色金蓮潤
撚斷花枝玉筍香輕洛浦笑巫陽錦紋親織寄檀郎
兒家閉戶藏春色戲蝶游蜂不敢狂

歸朝懽

聽得提壺沽美酒人道杏花深處有杏花狼籍鳥啼風
十分春色今無九麝煤銷永晝青烟飛上庭前柳畫堂
深不寒不暖正是好時候團團寶月憑纖手暫借歌
喉招舞袖真珠滴破小槽紅香肌縮盡纖羅瘦投分須
白首黃金散與親和舊且銜盃壯心未落風月長相守

孤鸞

沙隄春軟正宿雨初收落梅飄滿可奈東風暗逐馬蹄
輕捲湖波又還漲綠粉牆陰日融烟暖驀地刺桐枝上
有一聲春喚任酒帘飛動畫樓晚便指數燒燈時節
非遠陌上叫聲好是賣花行院玉梅對妝雪柳鬧蛾兒
象生嬌顫歸去爭先戴取倚寶釵雙燕

阮郎歸

清明寒食不多時香紅漸漸稀翻騰妝束鬧蘇隄留春
春怎知花褪雨絮沾泥凌波寸不移三三兩兩叫船
兒人歸春也歸

右花庵詞選

朝中措

竹

龍孫脫穎破苔紋英氣欲凌雲深處未須留客春風自
掩柴門蒲團宴坐輕敲茶臼細撲爐熏彈到琴心三
疊鷓鴣啼破黃昏

二郎神

柳花

日高睡起又恰見柳稍飛絮倩說與年年相挽卻又因
他相誤南北東西何時定看出沼青浮無數念蜀郡風
流金陵年少那尋張緒應許雪花比並撲簾堆戶更
羽綴游絲氈鋪小徑腸斷鶉鴣喚雨舞態顛狂恨腰輕
怯散了幾回重聚空暗想昔日長亭別酒杜鵑催去

右詞綜

賀新郎

客裏傷春淺問今年梅蕊因甚化工不管陌上芳塵行
 處滿可計天涯近遠見說道迷樓左畔一似江南先得
 暖向何郎庭下都尋遍孤負了看花眼 古來好物難
 爲伴只瓊花一種傳來仙苑獨許揚州作珍產須勝了
 千千萬萬又卻待東風吹綻自昔聞名今見面數歸期
 屈指家山晚歸去說也希罕

右 御選歷代詩餘

嚴

仁 邵武人字次山與同族嚴羽嚴參
 齊名時稱三嚴詞名清江欸乃

賀新郎

寄上官偉長

蘭芷湘東國正愁予一江紅葉水程孤驛欲寫瀟湘無
 限意那得如椽彩筆但滿眼西風蕭瑟我所思兮無處
 所在鐔津津上滄灣側誰氏子閩風客 閩風仙客才
 無敵賦悲秋抑揚頓挫淋離沈鬱百賦千詩朝復暮解
 道波濤春力憶其爾乘槎吹笛八表神游吾夢見渺洞
 庭青草烟波隔空悵望楚天碧

又

清浪軒送春

碧浪搖春渚浸虛檐蒲桃滉漾翠綃掀舞委曲經過臺
 下路載取落花東去問花亦漂流良苦花不能言應有

恨恨十分都被春風誤同此恨有飛絮 人生聚散元
無據儘凭闌一尊相對蘋洲春暮嫉色沖沖空悵望淚
盡世間兒女君不見千金求賦飛燕婕妤今何在看粘
雲江影傷千古流不去斷魂處

又 送杜子野赴省

說到城南杜儘風流至今人號去天尺五家世聯編蒼
玉佩自有文章機杼看鸞鳳九霄軒翥文陣堂堂新得
雋正少年壯氣虹蜺吐拈彩筆月城去 出關相送梅
千樹雪連空馬蹄特特曉寒人度帝里春濃花似海吹
入明光奏賦須快展亨衢闊步隨世功名真漫浪要平

生所學期無負須記得別時語

歸朝懽

南劍雙溪樓

五月人間揮汗雨離恨一襟何處去雙溪樓下碧千尋
雙溪樓上匏尊舉晚涼生綠樹漁燈幾點依洲渚莫狂
歌潭空月靜慘慘瘦蛟舞 變化往來無定所求劍刻
舟應笑汝只今誰是晉司空斗牛奕奕紅光吐我來空
弔古與君同記凭闌語問滄波乘槎此去流到天河否

又 壽禹平知縣

雲表金莖珠璀璨當日投懷驚玉燕文章議論壓西雍
風流姓字翔東觀紫皇嗟見晚祥麟五色留金殿大江

西銅章墨綬暫爾煩君縮 十二金釵扶玉盞錦瑟縱
縱隨急管獸爐烟動彩雲高秋聲拍碎紅牙板趣君歸
翰苑萊衣煥爛潘輿穩任方瞳從今看到弱水波清淺

又

朱戶綠窗深窈窕閃閃華旗紅幹小相逢斜柳絆輕舟
渚香不斷蘋花老西風吹夢草題詩未了還驚覺獨傷
心淒涼故館月過西樓悄 樓外斜河低浸斗夜已如
何夜將曉心期欲寄赤鱗魚秋雲不動秋江渺相思千
里道多情直被無情惱玉臺前請君試看華髮添多少

水龍吟

題連州翼然亭呈歐守

翼然新榜高亭翰林鐵畫燕公手滁陽盛事何人重繼
湟川太守太守謂誰文章的派醉翁賢胄對千峰削翠
雙溪注玉端不減琅琊秀 坐歎清香畫戟聽丁丁滴
花晴漏棠陰晝寂細賡賓客竹枝楊柳只恐明朝緜封
趣覲未容借寇儘江山識賞鹽梅事業煥青氈舊

又

題天風海濤亭呈潘料院

飈車飛上蓬萊不須更跨琴高鯉割然長歎天風瀕洞
雲濤無際我欲乘桴從茲浮海約任公子辦虹竿十丈
簪鉤五十親點對連鰲餌 誰榜佳名空翠紫陽仙去
騎箕尾銀鉤鐵畫龍拏鳳峙留人間世更憶東山哀箏

一曲灑沾襟淚到而今幸有高亭遺愛寓甘棠意

又題盱江偉觀

城頭傑觀崢嶸重闌下瞰蒼龍脊鏤珉盤礎彫檀竦
玲瓏金碧華子岡頭麻源谷口神仙窟宅道至今清夜
月明風冷常隱隱聞笙笛翠壁烟霞縹緲更寒泉飛
空千尺數峰江上孤舟天際夕陽紅濕抖擻征塵浩然
長嘯跨青鸞翼向鳳岡西望遙醜斗酒酌文章伯

水調歌頭

上韶州方檢討時有節制之命

慘淡望京闕慷慨夢天山引杯中夜看劍壯氣刷幽燕
鼙鼓滿天催曙畫角連雲嘯月吹斷戍餅烟犀角赤兔

馬虎帳綠熊羶

仗漢節伸大義斬樓蘭青冥更下斧

鉞赤子要君安鐵騎千羣觀獵宮樣十眉環座霹靂聽
鳴弦莫厭兜鍪冷歸去已貂蟬

木蘭花慢

社日有感

東風吹霧雨更吹起袂衣寒正莽莽叢林潭潭伐鼓鬱
鬱焚蘭闌干曲多少意看青烟如篆遶溪灣桑柘綠陰
猶薄杏桃紅雨初翻飛花片片走潺湲問何日西還
歎擾擾人生紛紛離合渺渺悲歡雲軒想何處也對芳
時應只在人間惆悵回文錦字斷腸斜日雲山

蝶戀花

快閣

傑閣青紅天半倚萬里歸舟更近闌干艤木落山寒鳧
雁起一聲漁笛滄洲尾 千古文章黃太史捫蝨高風
長照冰壺裏何以薦君秋菊蕊瘦瓢爲酌西江水

又

院靜日長花氣暖一簇嬌紅得見春深淺風送生香來
近遠笑聲只在秋千畔 目力未窮腸已斷一寸芳心
更逐游絲亂朱戶對開簾捲半日斜江上春風晚

鷓鴣天

一徑蕭條落葉深離腸淒斷月明砧征鴻送恨連雲起
促織驚秋傍砌吟 風悄悄夜沈沈鴛鴦機坐冷曉霜侵

挑成錦字心相向未必君心似妾心

又 閨思

多病春來事事慵偶因撲蝶到園中落紅萬疊花經雨
斜碧千條柳困風 深院宇小簾櫳幾年離別恰相逢
擎觴未飲心先醉爲有春愁似酒濃

又

行盡春山春事空別愁離恨滿江東三更鼓潤官樓雨
五夜燈殘客舍風 寒淡淡曉朧朧黃雞催斷丑時鐘
紫騮嚼勒金銜響衝破飛花一道紅

又

風言錄
一曲危絃斷客腸津橋換柂轉牙檣江心雲帶蒲帆重
樓上風吹粉淚香 瑤草碧柳芽黃載將離恨過瀟湘
請君看取東流水方識人間別意長

又

病去那知春事深流鶯喚起惜春心桐舒碧葉慳三寸
柳引金絲可一尋 憐繡閣對雲岑苦無多力懶登臨
翠羅衫底寒猶在弱骨離支瘦不禁

又

高杏酣酣出短牆垂楊裊裊蘸池塘文鴛藉草眠春晝
金鯽吹波弄夕陽 閑倚鏡理明妝自翻銀葉炷衙香

鳴鞭已過青樓曲不是劉郎定阮郎

又

公子詩成著錦袍王家桃葉舊妖嬈檀槽撻急斜金雁
彩袖翩躚彈翠翹 沈水過嬾重燒十分濃醉十分嬌
複羅帳裏春寒少只恐香酥拍漸消

玉樓春

春風只在園西畔薺菜花繁胡蝶亂冰池晴綠照還空
香逕落紅吹已斷 意長翻恨游絲短盡日相思羅帶
緩寶奩如月不欺人明日歸來君試看

阮郎歸

國言金
腮花輕拂紫綿香瓊杯初暖妝貪凭彫檻看鴛鴦無心
上繡牀 風絮亂恣輕狂惱人依舊忙夢隨殘雨下高
唐悠悠春夢長

婆羅門引

花明柳暗一天春色繞朱樓斷鴻聲喚人愁欲問鴻歸
何處身世自悠悠正東風留滯楚尾吳頭 追思舊游
歎雙鬢颯驚秋可惜等閑孤了酒令花籌斷絃難續漫
題詩分付與東流流不到蓬島瀛洲

醉桃源

春景

拍隄春水蘸垂楊水流花片香弄花嚙柳小鴛鴦一雙

隨一雙 簾半捲露新妝春衫是柳黃倚闌看處背斜
陽風流暗斷腸

好事近

曉色未分明敲動月邊鼉鼓卯酒一杯逕醉又別君南
浦 春江如席照晴空大舶夾雙艣腸斷斜陽渡口正
落紅如雨

訴衷情

一聲水調解蘭舟人間無此愁無情江水東流去與我
淚爭流 人已遠更回頭苦凝眸斷魂何處梅花岸曲
小小紅樓

多麗

最無端官樓畫角輕吹一聲來深閨深處把人好夢驚
回許多愁儘教儂受些箇事未必君知淚滴蘭衾寒生
珠幌翠雲撩亂枕頻欹窗兒上幾條殘月斜玉界羅帷
更堪聽霜摧敗葉靜扣朱扉念別離千里萬里問何
日是歸期關情處魚來雁往斷腸是兔走烏飛美景良
辰賞心樂事風流孤負縷金衣漫贏得花顏玉骨瘦損
爲相思歸須早劉郎雙髻莫遣成絲

一落索

清曉鶯啼紅樹又一雙飛去日高花氣撲人來獨自價

傷春無緒別後暗寬金縷倩誰傳語一春不忍上高樓
爲怕見分攜處

南柯子

柳陌通雲逕瓊疏啓翠樓桃花紙薄漬冰油記得年時
詩句爲君留曉綠千層出春紅一半休門前溪水泛
花流流到西川猶是故家愁

菩薩蠻

雙溪亭

征鴻點破空雲碧丹霞染出新秋色返照落平洲半江
紅錦流風清漁笛晚寸寸愁腸斷寄語笛休橫只消
三兩聲

右花庵詞選

嚴

參

邵武人字少魯
自號三休居士

沁園春

自適

日歸去來歸去來兮吾將安歸但有東籬菊有西園桂
有南溪月有北山薇蜂則有房魚還有穴螿有樓臺獸
有依吾應有雲中舊隱竹裏柴扉 人間征路熹微看
處處丹楓白露晞更寒原衰草牛羊來下淡烟秋水鱸
鱖初肥自笑平生頽然骨相只合持竿坐釣磯都休也
對西風無語落日斜暉

又 題吳明仲竹坡

竹焉美哉愛竹者誰曰君子歟向佳山水處築宮一畝
好風烟裏種玉千餘朝引輕霏夕延涼月此外塵埃一
點無須知道有樂其樂者吾愛吾廬 竹之清也何如
應料得詩人清矣乎況滿庭秀色對拈彩筆半窗涼影
伴讀殘書休說龍吟莫言鳳嘯且道高標誰勝渠君試
看正遶坡雲氣似渭川圖

右花庵詞選

嚴

羽

邵武人字儀卿自號滄
浪逋客有滄浪集詞附

滿江紅

送廖叔仁赴闕

日近觚稜秋漸滿蓬萊雙闕正錢唐江上潮頭如雪把

酒送君天上去瓊裾玉佩鵷鴻列丈夫身富貴等浮雲
看名節 天上事吾能說今老矣空凝絕對西風慷慨
唾壺敲缺不灑世間兒女淚難堪親友中年別問相思
他日鏡中看蕭蕭髮

右詞綜

陳以莊

建安人字敬
叟號月溪

賀新郎

和劉潛夫韻

曉夢鶯呼起便安排詩家廚傳酒家行李檢點花邊新
雨露春在萬家生齒道官似錦溪清駛但使有人畊綠
野正不妨鼓吹頻來此方覓句且夷俟 畫橋西畔多

春意記年年曾來幾度落花流水行到水窮雲起處依
約輞川竹里興未屬王孫公子料想明年端門裏有傳
柑宴罷黃封醉肯回首萬杉底

右花庵詞選

水龍吟

晚來江闊潮平越船吳榜催人去稽山滴翠胥濤濺恨
一襟離思訪柳章臺問桃仙浦物華如故向秋娘渡口
泰娘橋畔依稀是相逢處 窈窕青門紫曲舊羅新衣
翻金縷舊音恍記輕攏慢撚哀絃危柱金屋難成阿嬌
已遠不堪春暮聽一聲杜宇紅殷綠老雨花風絮

右詞綜

菩薩蠻

舉頭忽見衡陽雁
千聲萬字情何限
耐薄情夫一行
書也無
泣歸香閣恨
和淚淹紅粉
待雁卻回時
也無
書寄伊

右 御選歷代詩餘

李芸子

邵武人字耘叟自號芳洲有詞集戴石屏為序

木蘭花慢

占西風早處一番雨
一番秋記故國斜陽
去年今日落葉林幽
悲歌幾回激烈寄疎狂
酒令與詩籌遺恨清商

易改多情紫燕難留
嗟休觸緒繭絲抽
舊事續何由

奈予懷渺渺
羈愁鬱鬱歸夢悠悠
生平不如老杜便如
他漂泊也風流
寄語庭柯
逕菊甚時得棹孤舟

右花庵詞選

黃公紹

邵武人咸淳進士

青玉案

年年社日停針線
爭忍見雙飛燕
今日江城春已半
一身猶在亂山深處
寂寞溪橋畔
征衫著破誰針線
點點行行淚痕滿
落日解鞍芳草岸
花無人戴酒無人勸
醉也無人管

右詞綜

鶯啼序

銀雲捲晴縹緲臥長龍一帶柳絲蘸幾簇柔烟兩市簾
 棟如繪芳草岸彎環半玉鱗鱗曲港雙流會看碧天連
 水翻成箭樣風快 白露橫江一葦萬頃問靈槎何在
 空翠濕衣不勝寒日華金掌沈瀼發花平綠紋襯步瓊
 田湧出神仙界黛眉修依約霧鬢在秋波外 閣噓青
 蜃檐啄彩虹飛蓋蹴鰲背燈火暮相輪倒影偷睇別浦
 片片歸帆遠自天際舞蛟幽壑棲鴉古木有人剪取松
 江水憶細鱗巨口魚堪膾波涵笠澤時見靜景浮光霽

陰萬貌千態 蒹葭深處應有閑鷗寄語休見怪倩洗
 卻香紅塵面買箇扁舟身世飄萍名利微芥闌干拍遍
 除東曹掾與天隨子是我輩儘胸中著得乾坤大亭前
 無限驚濤總把遙岑月明滿載

右 欽定詞譜

馮取洽

延平人字熙之
自號雙溪翁

摸魚兒

和黃玉林遺蛻山桃花韻

歎劉郎那回輕別霏霏三落紅雨元都觀裏應遺恨一
 抹淡烟殘縷愁望處想霧暗雲深忘卻來時路新花舊
 主記刻羽流商裁紅剪翠山逕日將暮 空枝上時有

幽禽對語聲聲如問來否人生行樂須閑健衰老念誰
免此吾所與在溪上深深錦繡千花鳴何時定去但對
酒思君呼兒爲我頻唱小桃句

賀新郎 送別江定軒

夢折營門柳送君歸暫戲斑衣又攏征袖到得皇州風
景異只有湖山似舊把感慨寓之杯酒雨抹晴妝西子
樣且平章剩賦詩千首富與貴本來有 青油幕底籌
攻守擁貔貅朝氣凌雲夜鋒衝斗蜀稜淮氛猶在眼一
掃政須健帚又何惜馳驅奔走快展韜鈴資世用看歸
來金印懸雙肘傾玉罍爲親壽

沁園春

中和節爲玉林壽

稟氣之中具聖之和生逢令辰算三春中月方才破二
百年大齊去聲恰則平分立玉林深散花庵小中有條然
自在身詩何似似蘇州閑遠開府清新 青鞵布韞烏
巾試勇往蓉谿一問津有心香一瓣新聲一闋更攜阿
艾同壽靈椿劫劫長存生生不息寧極深根秋又春聊
添我作風流二老歲歲尋盟

西江月 太歲日作

老子齊頭六十新年第一今朝放開懷抱不須焦萬事
付之一笑 烟柳效顰翠斂露桃獻笑紅嬌已拚行樂

到元宵尚可追隨年少

蝶戀花

和玉林韻

秋到雙溪溪上樹葉葉涼聲未省來何許盡拓溪樓窗
與戶倚闌清夜窺河鼓 那得吟朋同此住獨對秋芳
欲寄花無處杖屨相從曾有語未來先自愁君去

右花庵詞選

水調歌頭

雪霽春已半露重午方暄一筇拄上高絕便覺眼前寬
指點數家樓閣檢校一川花柳綠水接青烟巒岫競圍
遶風日更清妍 鬧蜂媒紛使蝶菜花繁少年正爾行

樂誰復顧華顛自有此邱此坂那得游人簫鼓暖響出
中天歸步不妨晚恰則月初弦

金菊對芙蓉

和劉篁嶠韻

寶鏡懸空玉簪點水蕩搖千頃寒光正江妃月姊鬪理
明妝扶闌一笑開詩眼少容我吟諷其旁一川風露滿
懷冰雪雲海瀾茫 不妨倚醉乘狂問天公覓取幾曲
漁鄉聽小樓哀管偷弄初涼夜深歡極忘歸去錦江釀
透碧筍香對花無語花應笑我不是張郎

念奴嬌

次玉林韻

高堂素壁漫生綃十幅圖張消暑不奈火雲燒六合逃

也畧無逃處小派秋聲巨麓涼點吸歛來何許故人詞
翰此時飛落蓬戶 何幸一笑掀髯停杯浩唱三歎遺
音古雪碗冰甌無表裏更貯三危鮮露咀嚙生香清寒
入夢展轉忘宵曙對牀誤喜與君同聽風雨

沁園春

我愛之君結屋屏山友松竹梅有倦游孤劍暫懸素壁
醉吟行屨時印蒼苔得失不驚知恬交養浩浩胸中何
壯哉須知道似驂騑萬里道路方開 相期湖上舒懷
莫放過花枝與酒杯況上天已辦河東新賦園橋樂得
海內英才矍鑠溪翁據鞍一笑畫餅功名付儻來長隄

上看柳花荷氣儘可追陪

又

一雨沛然六合全清空無點埃喜秋容新沐爲誰嫵媚
涼蟾留照政爾徘徊蠟屐清游漁簑淡話富貴於余何
有哉雙溪上總舊盟鷗鷺來往無猜 烟霞竹石松梅
更無數幽花陸續開漸黃雞啄黍肥堪一箸浮蛆拍甕
美可三杯兒解應門翁方索句俗客來時莫放來青山
好儘從今日日闔不妨排

又 謝魏菊莊

舉世紛紛風靡波流名氛利埃有幽人嘉遯長年脩潔

寒花作伴竟日徘徊餐薦夕英杯迎朝露世味何如此
味哉揚揚蝶儘弄芳來往我又奚猜 雙溪約玉林梅
擬直到莊門一扣開奈衢山風急勒教回駕橫塘水弱
未許浮杯恨結停雲神馳落月白雪風前急墮來教兒
唱侑衰翁一醉無悶堪排

又 荅呂柳溪

問訊柳溪溪上柳容胡爲帶埃歎陽春陡變孰爲披拂
賞音難遇誰與徘徊好在湖山吾容不辱寄逕垂條豈
偶哉休搖蕩且深根寧極免俗人猜 何妨傍竹依梅
待青眼春回一笑開儘攀絲弄葉效翼施黛籠羈拂帽
問便陶門漢苑一任安排

又 和黃玉林

竊蔭傳杯未礙飛棉一高千丈風力微時穩下來天難
人事好乖雲散風流暗思去年記竹輿伊軋報臨邛裏
筇枝顛倒忙返溪邊剪韭新炊尋桃小酌取次歡謠俱
可編難忘處是陽春一曲羣唱尊前 新晴又放花天
況家釀堪攜不用錢想有人如玉已過南市無人伴我
重醉西阡舊約難憑新詞堪賦樂事賞心那得全歸來
也命兒將此意寫似朱絃

又 贈錦江歌者何琮

有孤竹君音節拂雲號曰洞簫縱柳郎填就周郎顧罷
欠伊品藻律也難調慚愧何郎嗚嗚嫋嫋翻入齟唇齒
舌喉誰知道是郭郎親授共貫同條 後來一輩枵枵
甚聲響都如鸚鵡嬌歎秦青已往嘉榮何在念奴骨朽
李八魂銷試向尊前聽君一曲前輩風流未覺凋馮郎
老但點頭嚙唾拚解金貂

賀新郎

和黃玉林爲題交游風月樓

自顧卑棲翼似滄洲白鳥悠悠靜依拳石聊寄一梯雲
木表俯視霽虹千尺樂江上山間聲色鏡樣清流環樣
繞笑賜湖一曲誇唐勅塵外趣有誰識 飛來妙墨痕

猶濕走盤珠流出不火食人胸膈三歎陽春知和寡但
覺光生虛室何處覓倚歌簫客他日玉林來得否待平
分風月供吟筆添一友共閑逸

又

和江定軒咏菊

句裏思黃九笑王郎不奈寒芳腰圍如柳得似江郎饒
雅趣時攬黃花誑口吐妙語與之爭秀閑遶珍叢吟不
盡儘風前月下纒纒瘦香自足豈勞嗅 一尊問我能
同否歎雙溪冷落籬邊傲霜猶有浩唱雲間金縷調興
發小槽珠酒待喚醒早春梅友獨恨愛花人易老漫一
年好景還依舊東望處立良久

又次黃玉林溪樓宴集韻

二老交相訪政不妨勃宰盤姍舍車而杖憶在蓉村新
雨過門外春流浩蕩中有箇列仙癯相把酒論詩饒氣
韻更柳邊花底同心賞臨別句幾回唱 忽傳風馭來
溪上遣兒曹策馬郊迎老懷歡暢爭訝金華佳父子飛
下蓬萊崑閩有四士追隨仙仗我愛君何如次道便令
人直欲傾家釀歌妙曲鄭聲放

右 御選歷代詩餘

馮艾子

延平人取浴子字偉壽自號
雲月精於音律多自製腔

玉連環

憶李謫仙

謫仙往矣問當年飲中儔侶於今誰在歎沈香醉夢華
清夜月流浪錦袍宮帶高吟三峽動舞劍九州隘玉皇
歸覲半空遺下酒囊詩佩 雲月仰挹清芬攬虬鬚尙
友風流千載算晉宋頽波羲皇淳俗都付尊前一慨待
相將共躡向龍肩鯨背蒼茫極目海山何處五雲靉黪

春風嫵娜

黃鐘羽

被梁間雙燕話盡春愁朝粉謝午花柔倚紅闌故與蝶
圍蜂遶柳棉無數飛上搔頭鳳管聲圓蠶房香暖笑挽
羅衫須少留隔院蘭馨趁風遠鄰墻梅影伴烟收 些
子風情未減睂頭眼尾萬千事欲說還休薔薇露牡丹

詞譜
球殷勤記省前度綢繆夢裏飛紅覺來無覓望中新綠
別後空稠相思難偶歎無情明月今年已是二度如鉤

春雲怨

上巳

黃鐘商

春風惡劣把數枝香錦和鶯吹折雨重柳腰嬌困燕子
欲扶扶不得軟日烘烟乾風收霧芳藥荼蘼弄顏色簾
幕輕陰圖書清潤日永篆香絕 盈盈笑靨宮黃額試
紅鸞小扇丁香雙結團鳳眉心倩郎貼教洗金罍共看
西堂醉花新月曲水成空麗人何處往事暮雲萬葉

雲仙引

桂花

夾鐘羽

紫鳳臺旁紅鸞影裏翻翻幾度秋馨黃金重綠雲輕丹
砂髻邊滴粟翠葉玲瓏烟剪成含笑出簾月香滿袖天
霧縈身 年時花下逢迎有遊女翩翩如五雲亂擲芳
英爲簪斜朶事事關心長向金風一枝在手嗅蕊悲歌
雙黛鬢遶臨溪樹對初弦月露下更深

眼兒嬌

自髻雙黛聽啼鴉簾外翠烟斜社前風雨已歸燕子未
入人家 鞋兒試著無人看莫是忒寬些想他樓上悶
拈簫管憔悴鶯花

木蘭花慢

次黃玉林韻

酒醒人世換碧桃靚海山春任青鳥沈沈紫鱗杳杳有

玉林人宮袍掉頭未愛愛荷衣不染市朝塵仙樣蓬萊
翰墨雲間鸞鳳精神 笑呼銀漢入金鯨瓊苑自由身
羨咳唾成章香熏花露音和韶鈞六丁夜來捧去便天
人也自歎尖新那得金牋飛洒浩歌平步青雲

右花菴詞選

李振祖

閩縣人字中山
寶祐四年進士

浪淘沙

春在畫橋西畫舫輕移粉香何處度漣漪認得一船楊
柳外簾影垂垂 誰倚碧闌低酒暈雙眉鴛鴦並浴燕
交飛一片閑情春水隔斜日人歸

右絕妙好辭

陳德武

閩縣人詞名
白雪遺音

浣溪紗

月落桐梢杜宇啼雲埋芳樹鷓鴣飛夜闌分作送春詩
山上安山經幾歲口中添口又何時相思一曲訴伊
誰

右詞綜

水龍吟

西湖懷古

東南第一名州西湖自古多佳麗臨堤臺榭畫船樓閣
遊人歌吹十里荷花三秋桂子四山晴翠使百年南渡

國言金
一時豪傑都忘却平生志 可惜天旋時異藉何人雪
當年恥登臨形勝感傷今古發揮英氣力士推山天吳
移水作農桑地借錢塘潮汐爲君洗盡岳將軍淚

沁園春 舟中夜雨

冬夜如年客枕無眠怎到天明待數殘二十五寒更點
聽餘一百八曉鐘聲雨脚敲蓬灘頭激纜總與離人訴
不平偏鬪得我浚深恨海砌起愁城 問君何事牽縈
想最苦人間是別情念千山萬水沈魚阻雁一身兩地
燭燕煎鶯繡枕痕多錦衾香冷意有巫山夢不成怎放
下這兩字相思萬里虛名

水調歌頭

詠惜花春起早

好是三春景都在百花軒美人眠不成夢早已繡簾掀
分付海棠睡足點檢牡丹開未桃李寂無言葉露聯珠
絡枝月墜金盆 樹鈴索高障檻補籬藩丁寧鶯燕蜂
蝶上下莫先翻遙想韶光九十只恐花飛一片瘦減玉
顏溫不憚銀瓶冷汲井沃芳根

又 詠愛月夜眠遲

三五嫦娥月夜色正嬋娟自從竊藥歸去天下幾千年
試問廣寒高處爲甚缺多圓少此理孰爲權望知天
定離合可人憐 典宮錦歌水調載酒船謫仙居士何

在月色尙依然遙想人生百歲三萬六千良夜能得幾
時圓莫遣金盆落達曙照無眠

又 詠掬水月在手

蓮襖凌波步筭浴影娥東晚粧脂粉猶膩雪潔弄春溶
恰似玉盤拈指莫是金環脫腕寶鏡逐華容好箇明珠
顛落在掌窩中 可人意拿不住握還空騎鯨便欲深
取恐觸臥驪龍奈玉春纖凍也那璧團圓何處有影却
無踪不上廣寒殿便入水晶宮

又 詠弄花香滿衣

夢足芙蓉曙步入牡丹叢試將枝葉枚數寵紫與嬌紅

如訴如歌體態輕暖輕寒天氣春色把人烘百斛沉檀
味兩腋麝蘭風 春衫透羅襪沁暗回中芳心能有多
少一點束千重只恐遊絲行露謾惹狂蜂輕蝶珍重惜
儀容蘭蕙脩芳佩蘋藻薦公宮

蝶戀花 送春

昨日狂風今日雨風雨相催斷送春歸去萬計千方留
不住春歸畢竟歸何處 好鳥如歌花解舞花鳥無情
也訴離愁苦流水落紅芳草渡明年好記歸時路

木蘭花 思情

自東君別後對花柳愈無聊但旅寓年年夢添夜夜飯

國言金
滅朝朝應憐此情何似恰海天風雨正瀟瀟奩玉有誰
暖眼帶圍謾自鬆腰 深沈庭院好香燒水遠玉人遙
念信阻蠻牋調空綠綺字滿鮫鮪東君也知人意幾黃
昏天際送蘭橈錦荔堂前載酒碧梧月下吹簫

清平樂 詠月

蛾眉淡斂未約心先許坐待不來來又去直到碧空深
處 雨雲偏妬妖嬌幾孤三五良宵要見殘粧新畫多
應莫莫朝朝

又 詠星

天孫自織經緯天南北明月樓臺高百尺玉手昔曾親

摘 種榆人去何年乘槎偶認張騫報道秋期近也好
將巧思相傳

又 詠風

呼來吸去畢竟爲誰主軟力慢扶花柳舞禁不住顛狂
處 等閑天易涼炎每教人愛人嫌最是相思病起呼
人緊下珠簾

又 詠雨

絲絲線線惹起雲根燕萬里江山春欲遍多在梨花庭
院 經旬一見通宵恍如身在藍橋說與巫山神女不
禁莫莫朝朝

又詠雲

隨風情性聚散元無定
雨過黃昏收拾盡
送出月明花影
誰言出岫無心騰騰飛上巫岑
夢斷不知何處玉人鬢上斜簪

又詠蟬

嬌聲嬌語恰似深閨女
三疊琴心音一縷
趨在綠陰深處
此音寧與人知
此身不與人欺
薄暮背將斜月噤聲飛上高枝

玉胡蝶

雨中對紫薇

好是春光秋色天工巧
處都上花枝更值雲情雨態淨

沐芳姿醉相扶霓裳舞困眠未得
宮錦淋漓有誰知
眼空相對心繫相思
相思鮫鮓帕上珠
懸紅淚水洗胭脂
寂寞闌干無言暗憶舊遊時
五花驄載將郎去
雙喜鵲報道郎歸卜佳期
夢回巫峽春在瑤池

水龍吟

雪後過瓜洲

問津楊子江頭滔滔潮汐東流去
六朝文物千年陳跡
幾更烏兔天限東南水流
今古地分吳楚
喜壯遊千里乘弧蓬
矢功名事儒生語
翹首石頭城北簇樓臺遠
連芳樹雪消天氣澄江如練
碧峯無數銀甕春回金山
鏡曉夢閑鷗鷺早歸來
盡日風平人靜孤舟橫渡

望遠行

城頭初鼓天街上漸漸行人聲
悄半窗風月一枕新涼
睡熟不知天曉最是家山千里遠
勞歸夢待說離情難
覺覺來時簷外數聲啼鳥
誰道爲甚新來消瘦底事
慊慊煩惱不是悲花非干病酒
有个離腸難掃悵望江
南天際白雲飛處念我高堂人老寸草心
朝夕怎寬懷
抱

滿江紅

記得年時離筵上把梅花折
還經盡江南烟雨淮陽風
雪寒食清明都過了
看看又到端陽節
倚闌干屈指數

流光經年別
心一寸腸千結
千里夢三更月更曉
來寒透不堪愁絕
羞見慈烏啼反哺
厭聞乳燕調新舌
覩禽物愈覺倍傷情
歸心切

憶秦娥

疎簾揭雲端仰見娟娟月
娟娟月不應何恨照人離別
閉門獨睡空愁絕
姮娥夢裏低低說
低低說悲歡離
合陰晴圓缺

踏莎行

中秋不見月

霧失南樓雲低東閣
枝頭不見南飛鵲
姮娥何事太無情
今宵故誤年時約
天易陰晴人多哀樂
從來此事

難憑度匆匆又是隔年期且燒銀燭酌高酌

踏莎行

聲跡隨風浪痕如霰藍橋路遠無由見黃昏腸斷倚闌
時看看數盡南飛雁日理絲機宵拈針線春秋不管
鶯和燕欲將心事訴佳期回文直上金鑾殿

右天一閣抄本

黃

鑄邵武人字希顏自號乙山官柳州守

小重山

涼入秋檐雨意長竹深啼絡緯響虛堂一枝燈影耿昏
黃疎簾外風度木犀香心事易成傷燕支坡下路語

如簧定情螺子玉釵梁鴛屏夢應到舊章郎

右陽春白雪

秋蕊香令

花外數聲風定烟際一痕月淨水晶屏小歌翠枕院靜
鳴蛩相應香銷斜掩青銅鏡背燈影寒砧半夜和雁
陣秋在劉郎雙鬢

右絕妙好辭

黃

簡建安人字元易自號東浦卒葬虎邱

眼兒嬌

畫樓瀕水翠梧陰清夜理瑤琴打窻風雨逼簾烟月種

種關心 當時不道春無價幽夢費重尋難忘最是鮫
綃暈滿蟬錦香沈

右陽春白雪

柳梢青

病酒心情喚愁無限可奈流鶯又是一年花驚寒食柳
認清明 天涯翠巘層層是多少長亭短亭倦倚東風
只憑好夢飛到銀屏

玉樓春

龜紋曉扇堆雲母日上彩闌新過雨眉心猶帶寶觥醒
耳性已通銀字譜 密奩綵索看看午暈素分紅能幾

許妝成按鏡問春風比似庭花誰解語

右絕妙好辭

鄭

楷

閩縣人字持
正自號看齋

訴衷情

酒旗搖曳柳花天鶯語軟於綿碎綠未盈芳沼倒影蘸
秋千 奩玉燕套金蟬負華年試問歸期是茶蘼後是
牡丹前

右絕妙好辭

李

呂

光澤人字濱老
有澹軒集詞附

鷓鴣天

臉上殘霞酒半消
晚妝勻罷却無膠
金泥帳小教誰共
銀字笙寒懶更調
人悄悄漏迢迢
瑣窗虛度可憐宵
一從恨滿丁香結
幾度春深豆蔻梢

調笑令

掩袖低眉情不禁
背人私語兩知心
烟蛾漸向愁邊
散細靨從教醉裏深
小梅破萼嬌難似
喜色著人吹不起
莫將羽扇掩明波
灑灑光風生眼尾
眼尾寄深意
一點蘭膏紅破蕊
鈿窩淺淺雙痕媚
背面銀床斜倚燭花先報
今宵喜管定知人心裏

又

賢川六疊小香檀
玉筍纖纖不耐寒
淺破朱唇促新
調紅絲短瑟未須彈
錦字兩行裝寶扇
扇中鸞影迷
嬌面蘭葉歌翻春事空
孤鳳雛鸞兩含怨

含怨兩鬢淺霧髻雲鬟
低玉燕綠沈香底金鵝扇
隱隱花枝輕顫當筵不放紅雲轉
正是玉壺春滿

右詞綜

劉學箕

崇安人字習之有方是閑居士詞

賀新郎

白牡丹舊都妓李師師也畫者曲盡其妙

午睡鶯驚起
髻雲偏鬢鬆未整
鳳釵斜墜宿酒殘妝無
意緒春恨春愁似水
誰共說厭厭情味
手展流蘇腰肢

瘦歎黃金兩鈿香消臂心事遠仗誰寄
簾櫳漸是槐風細對梧桐清陰滿院
夏初天氣回首春空梨花夢屈指從頭
暗記歎薄倖拋人容易目斷孤鴻沈雙鯉
恨蕭郎不寄相思字幽恨積黛眉翠

惜分飛

柳花

池上樓臺堤上路盡日悠揚飛舞欲下還重舉又隨胡蝶墻東去
糝逕飄空無定處來往綠窻朱戶却被春風妬送將蛛網留連住

念奴嬌

斷虹開霽淨秋容點點初收微雨日下生陰山影淡縹

縹雲烟吞吐烏帽風偏青鞵沙軟誤入桃溪塢多情鷗鷺偶來忽又飛去
日暮修竹佳人霧綃瓊佩綽約疑仙侶愧我禪心春盡絮不逐東風飛舞紅葉題詩紫雲傳恨密意渠能訴此情疎隔不關樓外烟樹

菩薩蠻

暮濤掀浪溪流急單衣未試春寒力是處綠陰濃春深楊柳風
人依溪岸住酒美忘歸去巢燕墜芹泥幽禽花外啼

醉落魄

江頭離席晚潮雙鷓催行色往來屬玉雙飛白笑我多

情猶作未歸客 紅塵奔走何時息歸心還似投林翼
角巾醉裏從歌側獨立東風天際露岑碧

眼兒嬌

十年不見柳腰支契濶幾何時天遙地遠秋悲春恨只
在雙眉 雁聲今夜樓西畔情慆渺難期杏花風景梧
桐夜月都是相思

桃源憶故人

暮霞散綺西溪浦天上晴霞開絮清絕梅花幾樹惱亂
春愁處 小橋流水人來去沙岸浴鷗飛鷺誰畫江南
好處著我閉巾屨

烏夜啼

夜泊揚子江

長亭急管生愁楚天秋落日寒鴉飛盡水悠悠 紅蓼
岸白蘋散浴輕鷗人在碧雲深處倚高樓

右詞綜

哨遍

松江長橋

木葉盡凋湖色接天雪月明江水淩萬頃一葦縱所之
若憑虛馭風仙子聽洞簫綿延不絕如縷餘音嫋嫋遊
絲曳迺舉酒賦詩玉鱗霜鱗是中風味偏美任滿頭堆
絮雪花飛更月澹篷窗凍雲垂山鬱蒼蒼橋臥沈沈夜
鵲驚起 噫倚蘭漿兮我今恍惚遺身世漁樵甘放浪

蜉蝣然寄天地嘆富貴何時功名浪語人生寓樂雖情
爾知逝者如斯盈虛如彼則知變者如是且物生宇宙
各有司非已有纖毫莫得之委吾心耳目所寄用之而
不竭取則不吾禁自色自聲本非有意望東來孤鶴縞
其衣快乘之從此仙矣

蝶戀花 北津夜雪

燈花已收正月半一夜東風吹得寒威轉恠得美人貪
睡暖飛瑛積玉千林變 道是柳綿春尙淺比著梅花
花已都零亂漠漠一天迷望眼多情更把征衣點

怨王孫 清明病酒

淑景韶光晴晝簾外雨欲無還有流鶯枝上轉新聲夢
初醒厭厭病酒 天連碧草凝情久思舊事不堪搔首
懷人有恨水雲深又綠暗橋西柳

戀繡衾 閨怨

柳絮風翻高下飛雨籠晴香徑尙泥女伴笑踏青好鳳
釵偏花壓鬢垂 亂鶯雙燕春情緒攪愁心欲訴向誰
人問道因誰瘦撚青梅閑歛黛眉

浣溪沙 木犀

天上仙人萼綠華何年分種小山家
九秋風露溢牕紗
密密翠羅攢玉葉團團黃粟刻金花
一枝歸插鬢雲

斜

賀新郎

用稼軒韻述懷

往事何堪說念人生消磨寒暑謾營裘葛少日功名頻
看鏡綠鬢鬢髻未雪漸老矣愁生華髮國恥家讐何年
報痛傷神遙望關河月悲憤積付湘瑟人心未可隨
時別守忠誠不替天意自能符合誤國諸人今何在回
首怨深次骨歎南北久成離絕中夜聞雞狂起舞袖青
蛇戛擊光磨鐵三太息皆空裂

又再韻賦梅

東閣憑詩說對丰姿飄然杖屨澹然巾葛竹外一枝斜

更好玉質冰肌粲雪誰折向滿頭宣髮水驛雲窻烟庭
院更宜晴宜雨還宜月霜夜永景蕭瑟孤芳夙與羣
芳別隴程遙攀條難寄碧雲驚合桃李漫山空春艷不
比仙風道骨有瀟洒清新奇絕我被幽香相懊惱宋廣
平豈但心如鐵蜚暗度石吹裂

滿江紅

避暑

午轉槐陰正炎暑侵肌似醉問何處披襟散髮解衣揚
袂傍沼茅亭楊柳綠倚崖草閣梧桐翠喚玉人纖手掬
清泉生涼意開枕簟浮瓜芡瓊液淺歌喉細對文禽
雪鷺助成幽致十頃碧蓮瀟洒國萬竿脩竹清涼世算

長言金
此時情緒有誰同吾儂自

又雙頭蓮

一柄雙花低翠蓋呈祥現美人正在薰風亭上滿襟如水二陸比方誇俊少兩喬相並修容止雨初晴午永鬪紅酣真奇耳雙白鷺雙蘋鯉飛與泳俱來此縮雙鬟天上侍香童子雙劍豐城雙孕秀雙鳧鄴縣雙趨起謾空談國士本無雙今雙矣

沁園春

嘆世

浮利虛名算來何用蝸角蠅頭笑勞生一夢兩輪催逼脆如朝露輕若春漚有限精神無窮世路劫劫忙忙誰

肯休堪驚嘆嘆癡人未悟終日營求百年光景雲浮把意馬心猿須早收有真仙秘訣煇霞導引丹砂鉛汞早與身謀閑是閑非他強我弱一任從教風馬牛還知道上蓬萊穩路入表神遊

念奴嬌

次韻范正之柳絮

水軒沙岸午風輕飄動一天晴雪日色晶熒光眩眼細逐遊絲明滅簾幕中間樓臺側畔渾是瑤瑛積綴松黏竹恍然如對三絕遙認髣髴飛花花非還似惱亂多情客點染春衫無定度又轉沉香亭北密密疎疎斜斜整整似雪難分別坡仙不見後人有口何說

西江月

世事從來無據人生自古難憑茫如天水有雲萍聚散
任他形影 每恠東陽瘦損常嗤騎省多情如今我也
瘦稜稜却喜青青兩鬢

水調歌頭

飲垂虹

三載役京口十度過松江垂虹亭下烟水長是暎篷窻
釣得錦鱗鮮鱸快把霜螯浩飲豪氣未能降醉舞影零
亂心逐浪春撞 景蒼茫歌歎乃石空磴蒹葭深處適
意魚鳥自雙雙便擬輕舟短棹明月清風長共與世絕
紛茏嘉遯有真隱不羨鹿門龐

